

Na Sasaga me ra Buli ka na Lewe ni Vanua Vakaitikotiko: Na i dusidusi vei kemuni na kerekere

Na sasaga oqo e yacana na Creative Communities Scheme. E rau bucina vata na Creative New Zealand (na tabana e qarava na vakabulabulataki kei na maroroi ni cakacaka ni liga, vosa, meke, vucu, sere kei na veika vakaoqori, ni vanua raraba) kei na veimatabose ni koro e Niu Siladi. E i tavi ni matabose yadua ni koro me raica na kena tauyavutaki na sasaga oqo e na veivanua e tiko e rukuna. E vakabibitaki taudua eke na nodra vakatulewa na lewe ni vanua: e na dikeva na kerekere taucoko na kena komiti ka ra lewena ko ira era buta vinaka e na veika e caka tiko e na vanua era dui vakaitikotiko kina.

Na i naki ni sasaga oqo

E tokona ka veivakauqeti vei ira na lewe ni veivanua vakaitikotiko e Niu Siladi raraba na Creative Communities Scheme e na nona vakarautaka me caka na veimataqali ka duidui, me rawa kina vei ira na lewe ni vanua me ra vakaitavi e na nodra bulia se cakava na veika e rawa ni ra vakaraitaka.

E okati e na sasaga oqo na veika taucoko e rawa ni buli me vaka na cakacaka ni liga taucoko sara, na meke, sere, kei na vuqa tale, me vakaraitaki kina na nodra rai kei na veika e tu e lomadra na lewe ni vanua vakaitikotiko.

Ko cei e rawa ni kerekere?

E rawa na kerekere yadua se vakailawalawa.

E rawa ni ra kerekere ko ira na lewe ni vanua e Niu Siladi se ko ira era sa vakaitikotiko tudei.

Kevaka ko a sa vukei oti vakailavo mai na Creative Communities Scheme, e na ka ko cakava taudua se cakava na i soqosoqo ko lewena, ko sa na kila mai kina ni dodonu me volai oti na i tukutuku me baleta na ka e a caka, ni bera ni qai vakasamataki e dua tale na nomu kerekere.

Na soli ni veivuke vakailavo: E rawa beka ni vakailavotaki na ka au via cakava?

E na vakailavotaki na ka e gadrevi me caka kevaka e –

- » vakabibitaki kina na cakacaka ni liga kei na veika vakaoqori, kei na buli ka e vakavatukanataki kina na i valavala vakavanua
- » muri vakavinaka e dua se sivia na tolu na ka e gadrevi me vaka e tabaki koto oqo e ra
- » na oti taucoko na ka e caka e na loma ni 12 na vula mai na gauna e vakadonui kina na kerekere
- » na yaga vei ira na lewe ni vanua vakaitikotiko
- » caka e na loma ni koro se yasa ni vanua e caka mai kina na kerekere, se me yaga vei ira e na loma ni koro se na vanua e vakavolivolita
- » **sega** ni sa tekivutaki ni bera ni vakadonui na kerekere
- » **sega** ni sa vakailavotaki oti mai na uma i lavo ni Creative New Zealand (contestable funding), e dau soli e na mataqali sasaga vata vakaoqo
- » **sega** ni sa vakailavotaki oti mai na uma i lavo ni Creative New Zealand e na porokaramu e vakailavotaki kina na sasaga me vica vata na yabaki (multi-year funding programme).

Na yavu ni kena soli na vevuke vakailavo

E na soli na vevuke vakailavo kevaka e okati e na ka ko via cakava e dua se sivia na tolu na ka e gadrevi, me vaka e tabaki koto oqo:

- » **Na nodra vakaitavitaki e dua na i wase levu ni lewe ni vanua** – Me dolava ka solia vei ira na lewe ni vanua raraba na galala me ra vakaitavi e na veika e caka me baleta na droini, cakacaka ni liga, buli sere kei na meke kei na veika vakaoqori.
- » **Na rabailevu kei na duidui ni veika e caka** – Me tokoni e na ka me caka, na veika duidui era kilai tani kina na veiuma tamata e na nodra dui i valavala vakavanua, me vakalevutaki kina na ka era kila, me vakatakilai kina na duidui ni nodra i valavala vakavanua na lewe ni dua na vanua vakaitikotiko.
- » **Ko ira na i sausau vou ni mataka** – Me rawa ni vakauqeti ira na cauravou kei na gone yalewa (era se bera ni yabaki 18), me ra dau tiko ka vakaitavitaki ira e na veika me baleta na buli ka.

E wili e na veika e rawa ni vakailavotaki, na veika oqo –

- » vakaraitaki ka, na caka drama, na vakatasuasua, na soqo ni veivakamarautaki, na vuli leleka kei na vakaraitaki ni veika e rawa ni vukea na nodra vakaitavi na lewe ni vanua e na buli ka
- » kena caka na veika e tokona na i valavala vakavanua kei na buli ka ni dui uma tamata
- » nodra buli ka na cauravou kei na gone yalewa
- » nodra liutaka na kena dau e na buli ka, na veika me ra vakaitavitavi kina na lewe ni vanua e na nodra dui i tikotiko
- » veika me vakayagataki e na ka me caka se na porokaramu e vakarautaki
- » nodra saumi ko ira era cicivaka na ka e caka ga vakadua, se lekaleka na gauna e cicivaki kina
- » kena tokoni ka vakadewataki raraba vei ira na lewe ni vanua vakaitikotiko na veika e caka tiko me baleta na buli ka.

Na veika e na sega ni vakailavotaki e wili kina na –

- » veika e sega ni qaravi vakatabakidua kina na buli ka
- » veika e dodonu me qaravi e koronivuli se so tale na i tikotiko ni qaravi vuli
- » i sau ni kena qaravi tiko na cicivaki ni veika tale e so, ka sega ni baleta na caka ni ka e soli na kena i lavo
- » veika e dodonu me qarava vakatabakidua e dua na i soqosoqo se dua e dau veiqaravi raraba
- » i sau ni dua na sasaga sa tekivutaki oti se sa vakacavari
- » i sau ni veivakani ni caka e dua na soqo
- » veisasaga ni kumuni i lavo
- » vakatorocaketaki ni vanua ni soqo, me vaka na cina ni vanua ni vakaraitaki ka kei na vale ni vakatasuasua, na i latilati ni kena rara e cake, se vakavinakataki ni vale taucoko
- » voli ni i yaya tudei me vaka na komipiuta, i taba se i yaya ni vakatagi.